

宋太宗實錄殘本

一



宋太宗實錄

殘本二十卷

恭綽題



傅氏藏園據宋館閣
寫本及舊鈔本校刊

太宗皇帝實錄卷第二十六

起太平興國八年六月盡十月

六月乙酉朔以給事中直學士院徐鉉爲右散騎常侍以
職方員外郎高繼申爲兩浙諸州轉運使丙戌河南府言
洛水漲五丈餘壞鞏縣官寺軍壘民廬舍殆盡左諫議大
夫知開封府邊珣卒珣字待價華州下邳人父蔚仕至太
常卿珣天福六年舉進士登第解褐授祕書省祕書郎直
昭文館遷右補闕起居舍人改庫部職方員外郎受詔知
通州以牢盆賦於民大煮鹽於郎山歲得萬餘石國初出
爲洛陽令徵爲倉部郎中隴蜀平命珣知三泉縣入爲職
方郎中揚州言民盜殺廣陵縣尉謝圖父捕繫民凡三百
日獄未具州以聞命珣按之盡得其實民抵罪開寶中知
揚州會征江表兼領淮南轉運使上卽位遷吏部郎中

嶺南轉運使徵爲右諫議大夫領吏部選事移知開封府
至是卒年六十三珣強力有吏材 上方欲倚用及聞其
死嗟嘆者數四賜其家絹百匹錢二十萬以營葬事丁亥
以翰林學士中書舍人李穆知開封府膳部郎中知雜
勝中正爲右諫議大夫權御史中丞吏部郎中許仲宣爲左
諫議大夫依前嶺南轉運使兵部郎中劉保勳爲右諫議
大夫刑部郎中辛仲甫爲右諫議大夫依舊知益州以庫
部員外郎楊徽之爲刑部郎中大理正孔承恭爲庫部員
外郎同考校京朝官殿最甲午河南府言穀水伊水洛水
漚水暴漲溢出岸壞官寺軍壘寺觀祠廟民廬舍萬餘區
溺死者以萬計丁酉詔曰自今京朝官知錄事參軍及知
縣事者見本郡長吏用賓主之禮宴集班位其常參官在

判官之上未常參官在推官之上所乘馬並不得用繁纓
違者所在以聞當行責罰已亥制曰漢以尙書平處奏議
魏以中書參掌機密邦國之務率繫於樞衡軍旅之謀多
出於帷幄授受之際厥維艱哉宣徽南院使兼樞密副使
金紫光祿大夫檢校司徒上柱國瑯琊縣開國男王顯器
量恢宏襟靈秀拔常事藩邸備極公忠累踐榮班遂膺顯
用風雨如晦益勵匪躬之誠夙夜惟寅愈挺致君之志樞
機之任獻替尤資宜正名稱用伸毗倚勉堅許國之節式
副知臣之明可檢校太保充樞密使進封本郡侯 上召
謂顯曰卿代非儒門少罹兵亂必寡學問今在朕左右典
掌萬機固無暇博覽羣書命左右取軍戒三篇賜顯曰讀
此亦可免於面牆矣又以宣徽北院使柴禹錫爲宣徽南

院使依前樞密副使右諫議大夫王明爲給事中依前充
鹽鐵使左衛將軍陳從信爲本衛大將軍依前度支使潭
州言長沙縣民程景鴻五世同居內無異爨詔旌表門閭
常稅外免其他役陝州言永定澗水漲溢出岸壞民廬舍
軍壘千餘區丙午乾寧軍言御河水漲七尺五寸戊申新
及第進士王世則以下十八人送中書門下處分餘並送
流內銓命文明殿學士李昉樞密直學士張齊賢王沔中
書舍人王祐同於吏部注擬 上謂李昉等曰天下州縣
闕官朕親選多士忘其飢渴召見臨問以觀其才豈望拔
十得五但十得三四亦嚴穴無遺逸朝廷多君子矣朕每
見布衣搢紳間有端雅爲眾所推舉者朕代其父母喜或
召拜近臣必擇良日欲其保終吉也朕於士大夫無所負

矣昉等拜謝己酉兗州言泰山父老并瑕邱等七縣民陳
延福等千四百九十三人自言詣闕請封禪遣觀察判官
廖文鐸護送之辛亥賜樞密使王顯開封府道德坊宅一
區賜宰相文明翰林樞密直學士中書舍人節度使察使
建州所貢新茶

秋七月甲寅朔工部侍郎致仕劉載卒載字德輿范陽人
唐節度使總之五代孫也父昭任潁州下蔡令載後唐清
泰中舉進士及第解褐授祕書省校書郎累遷左拾遺集
賢殿學士改殿中侍御史周顯德中歷倉部員外郎知制
誥擢拜右諫議大夫給事中國初出知貝州代還奉使江
表復命知鎮州坐與兵馬部署何繼筠不協爲所搆太
祖惡之出爲山南東道節度行軍司馬僅十年上卽位

徵赴闕復爲給事中以老病乞骸改工部侍郎致仕仍賜一子出身至是卒年七十六載頗刻勵爲學博通史傳著弔戰國賦萬餘言行於世雅好釋氏佞佛甚謹晚年專以蔬食誦經爲事雅尙名節頗爲流輩所稱戊午泰山父老辭歸故郡各賜束帛以遣之以新及第進士王世則等一十八人並爲大理評事知縣錄事參軍又以第二等進士吳鉉爲大理評事史館勅書鉉餘杭人舉進士嘗重定切韻及上親試因捧以獻旣中第因令隸史館校定字書故有是命鉉所定切韻多以吳音作俗字數千增之鄙陋尤甚尋禮部試貢士爲鉉韻所悞有司以聞詔盡索而毀之永不得行用丁卯制曰計功稱伐則銘於旆常尙齒優賢則賜以几杖我有舊老時惟宗臣願追赤松之遊盡納

水衡之俸不舉殊典何答元勳開府儀同三司檢校太師
行右金吾衛上將軍判街仗司事上柱國邠國公王彥超
早擁節旄亟更藩閫許國之誠夙厲臨戎之績素高爲列
辟之楷模實累朝之勞舊緹騎二百寵以執金之權宸居
九重聿成高枕之適遽形表疏願避官榮爰推進秩之恩
以遂懸車之請優以廩給表子眷懷可太子太師致仕仍
依舊給右金吾衛上將軍俸料已巳安化軍節度使沈承
禮卒承禮字正臣吳興人錢鏐辟置幕下攝處州刺史鏐
卒子元瓘以其女妻之署以牙校及錢俶襲位加承禮知
威武軍節度使王師征江南俶命承禮率所部助攻毘陵
平之又攻潤州吳人夜竊出焚外柵將帥皆欲馳救承禮
曰古人有言擊東南而備西北者此之謂也命士皆擐甲

募食堅壁不動他壘不設備者悉驚擾獨承禮所部整肅
吳人不敢窺既平丹陽遂率兵抵建業江南平 太祖錄
其功特授威武軍節度福州管內觀察處置等使 上卽
位錢俶盡獻浙右之地以承禮爲密州刺史安化軍節度
使至是卒年六十七詔輟視朝兩日贈太子太保葬事官
給辛未制曰中書舍人參知政事郭贄簪筆持橐獲侍於
初潛曳組鳴珂久塵於清切頃參台席實代天工而啟沃
茂聞尸素斯極飲酒過量自貽沉湎之譏發言無稽益彰
容易之態所宜左降尙屈典刑可責授祕書少監壬申以
左衛上將軍向拱領左金吾街仗事宥州刺史李繼瑗爲
右清道率府副率庚辰以左諫議大夫宋琪爲刑部尙書
依前參知政事文明殿學士工部尙書李昉守本官參知

政事辛巳詔開封府管內酸棗陽武封丘長垣等四縣民田爲黃河水所害及開封浚儀中牟尉氏襄邑雍丘等六縣民田爲蔡河廣濟白溝河溢及水澇所損者並蠲其租鄆州言河水漲溢入城壞官寺民廬舍四百餘區河南府言黃河水漲五丈七尺壞河清縣豐饒務倉庫軍壘民廬舍千餘區荆門軍言長林縣山水暴漲壞民廬舍五十一區凡五十六人溺死陝州言河水漲斷浮梁壬午免盜察御史張巽仍削四任坐通判澶州日縱部下館驛吏擅費用官物而不舉也夔州言江水漲七尺乾甯軍言御河水漲六尺襄州言漢水漲三丈二尺破虜軍言滹沱河水漲一丈四尺祁州言資河水漲溢入城壞軍壘民廬舍百餘區滄州言葫蘆河漲水八尺雄州言易水漲一丈三尺壞

民廬舍癸未駕幸含芳園習射張樂賜從官飲

八月戊子朔以祠部郎中羅延吉監侍御史知雜事辛卯
司天言壽星見內地海門採珠塲貢真珠二百二十八斤
壬辰制曰古先哲王恭默思道一物失所在予之罪實深
四時不和責躬之言尤切今歲天降霖雨自春徂秋水出
平原河決近郡下民離於昏墊大田變於污萊蓋念堯舜
之功格天不能逃陰陽之數禹湯之言罪己所以致邦國
之興朕端居九重夕惕若厲潔粢豐盛以懇禱卑宮菲食
以隱憂至誠尙通和氣來應氛霾清霽稼穡豐穰取萬箱
而可期食四鬴而何遠宜伸肆眚之澤以答乃眷之仁應
兩京諸道州府軍監縣鎮繫囚限德音到日除十惡官吏
犯正枉法贓及謀殺故殺劫殺人外其餘罪無輕重特與

除放諸處亡命軍人及聚山林爲羣盜者限詔到一月並許於所在陳首限滿不首復罪如初配流徒役人等並具元罪犯以聞別聽進止癸巳詔曰桂州管內先配民歲市沙糖及茶園久荒吏歲徵其課先以官牛給與民歲取租牛死而吏猶督其直關市征常額外增錢百八十貫文並除之官牛二百三十頭賦與貧民丁酉山後兩林蠻王弟牟昂等二百三十九人以名馬來貢以右補闕直史館徐林復爲職方員外郎右贊善大夫蘇易簡爲右拾遺並皆知制誥詔曰朕選用羣材分領庶職雖九品之賤一命之微未嘗專委於有司必須召對於便殿親與之語以觀其能儻敷納之可觀必越次而命賞恩或由於僥倖理未至於澄清自今應親臨選擇官吏並送中書更審勘履歷別

聽進止辰州言溪錦敘富等四州蠻求內附輸租稅詔令
州長吏察其謠俗情僞并按視山川地形具圖來上戊戌
以故永興軍節度使吳廷祚次子元展爲右衛將軍駙馬
都尉徐州言清河漲一丈七尺溢出堤塞城三門以禦之
庚戌制曰宥密之務蓋總於萬機師長之任實參乎百揆
職事斯設在勞逸而則殊名器所先固授受而惟允樞密
使金紫光祿大夫戶部尙書上柱國樂陵郡侯石熙載達
識兼濟偉量傍通早在初潛實預寶佐韋弦之誠動靜有
常金石之誠夷險如一自總鈞軸屢進讜言方參帷幄之
謀遽嬰寒暑之疾抗章引退瀝懇彌堅宜推加等之恩卽
俟有瘳之喜勉思頤養式副倚毗可尙書右僕射先是熙
載以足疾假滿抗表解職故有是命辛亥詔增周公諡法

五十五字美諡七十一字爲一百字平諡七字爲二十字
惡諡十七字爲三十字仍令翰林學士承旨扈蒙中書舍
人王祐同詳定蒙等奏議曰上所增五十五字皆可用其
沈約宋琛續廣諡請停廢詔從之詔曰史氏之職歷代所
先政令之大小必書人君之言動皆錄累朝多故舊典闕
如策書所記殊爲漏落自今軍國謀議宰相與聞者宜令
工部尙書參知政事李昉撰錄每季送史館樞密院公事
亦令副使一人專知纂錄送付史氏昉上言所修時政記
每月先以奏御後付所司從之王子詔曰先是祠部給僧
尼牒並傳送諸處州長吏親給如聞吏爲姦募人以緡錢
市取齋以至外郡賣焉得善價卽付與之自今所在宜奉
行前詔違者重致其罪

九月癸丑朔以洛苑使王賓領潭州刺史與儒州刺史許昌裔同知水陸發運軍器庫使順州刺史王繼昇駕部員外郎劉蟠同知陸路發運先是每歲運江淮米四五百萬斛以給京師率用官錢餉率船役夫頗爲勞擾至是每艘計其直給與舟人俾其自召募甚以爲便而舟數百艘留河津月餘不得去 上遣期門卒偵之計吏自言有司除常載外別科買羊皮赤堊鉛錫蘇木等物守藏者不卽受故也 上怒奪三司使一月俸分命王賓等領水陸發運自是貢輸無滯矣以國子監主簿楊文舉爲國子監丞史館編修宿州言灑河水漲溢浸民田六十里祕書監錢昱獻太平興國錄一卷戊午詔曰近年已來河堤頻決壞廬舍畷田畝數郡被其害先是築遙堤以遏水勢民利其膏